

BATIZMU NA'I NIAN – TINAN B

Tema Festa Batizmu Na'i nian

Iha Jezús nia batizmu iha mota Jordão, Maromak revela nia Oan-Mane doben, ne'ebé Nia haruka mai mundu ho misaun atu salva no liberta ema sira. Hodi kumpre Aman nia projetu, Nia sai ida hanesan ita, fahe ita-nia frajilidade no umanidade, liberta ita husi egoizmu no salan no empeña An atu promove ita, atu ita bele to'o ba moris iha plenitude.

Leitura dahuluk haklaken “Atan” misteriozu ida, Maromak hili no haruka ba ema sira atu lori justisa no dame rohan-laek... Ho Espíritu Maromak nian, nia sei konkretiza ho haraik-an no simplisidade, hodi la uza podér, impozisaun, prepoténsia, tanba buat sira-ne'e la tama iha Maromak nia eskema sira.

Iha *Evanjellu*, mosu konkretizasaun promesa profétika: Jezús mak “Oan-Mane/Atan” ne'ebé Aman haruka, no iha Nia Espíritu horik bá no Ninia misaun mak realiza ema sira nia libertasaun. Hodi obedese ba Aman, Nia sai ema, identifika An ho ema sira nia frajilidade, la'o iha sira nia sorin, atu promove sira no lori ba rekonsiliaun ho Maromak, ba moris nakonu.

Leitura daruak afirma fali katak Jezús mak Aman nia Oan-Mane doben ne'ebé Nia haruka mai mundu atu konkretiza projetu salvasaun nian; tanba Nia “la'o iha mundu hodi halo di'ak” no liberta ema sira ne'ebé iha opresaun. Ne'e sasin ne'ebé eskolante sira tenke fó, atu salvasaun ne'ebé Maromak oferese to'o ba povu hotu rai nian.

LEITURA I – Is 42,1-4.6-7

Ita-nia testu pertense ba “Livru Konsolasaun” Deutero-Isaías nian (kf. Is 40-55). “Deutero-Isaías” mak naran konvensional ne'ebé biblista sira fó ba profeta anónimu eskola Isaías nian, ne'ebé kumpre nia misaun profétika iha Babilónia, entre judeu sira iha ezíliu. Ita iha finál Éziliu nian, entre 550 no 539 mK no judeu sira frustradu no lakon dalan, maski profeta Ezequiel promete libertasaun ne'ebé sei mai lalais.

Deutero-Isaías mak mensajen atu konsola sira. Nia haklaken libertasaun no kompara sira-nia saida husi Babilónia hanesan ézodu antigu, husi Ejitu (kf. Is 40-48); hafoin, haklaken rekonstrusaun Jerusalém nian, sidade ne'ebé funu harahun tiha ba akudesan, maibé Maromak sei lori fali ba nia ksolok no dame rohan laek (kf. Is 49-55).

Testu ne'ebé ohin propoin mak parte husi knananuk dahuluk “Atan' nian (kf. Is 42,1-9). Posivel katak personajen knananuk dahuluk nian refere ba Ciro, liurai Pérsia nian, ema ne'ebé Maromak konfia ninia Povu nia libertasaun.

MENSAJEM

Ita-nia testu fahe ba parte rua; parte hotu afirma “Atan” nia eleisaun no ninia misaun. Maski nune'e parte uluk dezenvolve liu aspetu bolun nian; parte daruak define di'ak liután kestaun misaun nian.

Iha primeira parte (vers. 1-4), afirma katak “Atan” mak “eleitu” ida (“behir”) Maromak nian, katak ema ida ne'ebé Maromak “hili” eh fihir (“bahar”) husi ema barak, ba funsaun eh misaun espesial ida (kf. Nm 16,5.7; 17,20; Dt 4,37; 7,6.7; 10,15; 14,2; 18,5; 21,5; 1 Sm 2,28;

10,24; 2 Sm 6,21; 1 Re 3,8; etc.). Ita iha kontestu “eleisaun” nian, katak kontesru iha ne’ebé Maromak destaka ema ida husi ema barak ba Ninia servisu.

“Atan” nia “ordenasaun” realiza liuhusi don Espíritu (“ruah”) nian, ne’ebé haraik ba “Atan” kbiit Jahwéh nian, kapasidade atu lori misaun to’o rohan: Espíritu ne’e mak ida ne’ebé Maromak haraik na xefe karizmátiku sira Maromak nia Povu nian (kf. Jz 33,10; 1 Sm 9,17; 16,12-13). Hodi Espíritu ne’e nia kbiit, “Atan” sei lori “justisa (‘mishpat’) ba nasaun sira”: misaun ida iha ámbitu universál, konsiste implementasaun desizaun justa iha tribunál sira, baze ba orden sosiál ne’ebé la’o ho Maromak nia eskema no projetu sira. Implementasaun ba “orden foun” ne’e la halaho hodi uza forsa, violénsia, espetákulum maibé ho laran-di’ak, laran-maus, simplisidade ne’ebé define Maromak nia lójika. Liuliu, “Atan” sei atua ho simplisidade, hosi la impoin no hodi la dezanima hasoru difikuldade sira iha misaun.

Iha segunda parte (vers. 6-7), hahú hodi afirma katak Na’i bolu “Atan”, hafoin haktuir kedas ba bolun ne’e nia finalidade: lori “justisa” (“tzedeq”) – katak “Atan” nia misaun mak lori orden sosiál loos. Maromak konvida “Atan” atu sia “naroman nasaun sira-nian” no, iha konkretu, loke matan-delek sira nia matan, hasai dadur sira husi prizaun no sira ne’ebé hela iha nakukun laran. Tanba ne’e, ida-ne’e mak misaun libertasaun no salvasaun nian.

Iha parte rua sai klaru katak “Atan” mak instrumentu ida atu Maromak atua iha mundu atu lori salvasaun ba ema sira: Maromak hili nia husi ema barak nia leet no konfia misaun ida – lori justisa, propoin ba nasaun hotu orden sosiál foun iha ne’ebé sei halakon nakukun sira ne’ebé impede atu ema la’o no oferese ba em ahotu liberdade no dame. Maromak la’ós de’it iha orijen (hilin, bolun no mandatu), maibé sei akompaña “Atan” atu konkretiza misaun nia realizasaun: atu hala’o misaun nia sei hetan tulun husi Espíritu Maromak nian, ne’ebé sei haraik kbiit atu asume misaun no halo sai konkretu.

LEITURA II – Apóstolu sira nia Hahalok 10,34-38

“Apóstolu sira-nia hahlok” mak katekeze ida kona-ba “etapa Kreda” nian, katak forma oinsá eskolante sira asume no kontinua projetu salvasaun Aman Maromak nian – no oinsá lori ba mundu tomak, bainhira Jezús husik ona mundu ne’e.

Livru fahe ba parte rua. Ida dahuluk (kf. Apost 1-12), reflesaun apresenta mai ita Evanjellu nia difuzaun iha Palestina nia laran, liuhsui Pedro no Apóstolu na’in Sanulu-resin-rua nia hahalok; ida daruak (kf. Apost 13-28) apresenta mai ita Evanjellu nia espansaun iha Palestina nia li’ur (to’o Roma), liuliu hodi Paulo ninia hahalok.

Ita-nia testu ohin integra iha parte dahuluk “Apóstolu sira-nia hahalok” nian. Iha ne’ebá haktuir Pedro nia atividade misionária iha rai-tetuk Sharon nian (kf. Apost 9,32-11,18). Testu propoin mai ita sasin no katekeze Pedro nian iha Cesareia, iha senturiaun romanu nia Cornélio nia uma. Espíritu mak bolu nia (kf. Act 10,19-20), nune’e Pedro tama iha Cornélio nia uma, hato’o ba nia buat esensiál fiar nian no sarani nia, nune’e mós nia uma-laran tomak (kf. Apost 10,23b-48). Epizódiu ne’e importante tanba Cornélio mak ema jentiu dahuluk atu tama iha kristianizmu liuhusi Apóstolu ida husi na’in Sanulu-resin-rua nia haklaken no sasin: signifika katak moris foun mai husi Jezús no lori ba ema hotu laho disitinsaun.

MENSAJEN

Iha ninia diskursu, Pedro hahú hodi rekoñese katak proposta salvasaun nian ne’ebé Maromak oferese no Kristu lori mai mak proposta universál no destina ba ema hotu, laho distinsaun (vers. 34-36). Israel mak loloos resetór privilejiadu dahuluk Maromak nia Liafuan nian; maibé Kristu lori “liafoun di’ak dame nian” (salvasaun) ba ema hotu; no agora, hodi sasin

sira Jezús nian, proposta salvasaun ne'ebé Aman halo to'o ba povu hotu ne'ebé pratika justisa – ba mane no fetu hotu, lahó distinsaun rasa, kór, estatutu sosiál, ba sira ne'ebé aseita no adere ba Jezús ni a proposta.

Hafoin, Pedro apresenta rezumu ida fiar primitiva nian (vers. 37-38), katak atua misaun fundamentál eskolante sira-nian: haklaken Jezús no fó sasik kona-ba salvasaun ne'ebé tenke to'o ba ema sira. Leitura ne'ebé propoin mai ita konserva de'it parte inisiál “kerigma” primitivu nian no rezume Jezús nia atividade nu'udar “la'o iha mundu hodi halo di'ak no fó isni di'ak ba sira hotu ne'ebé diabu hanehan, tanba Maromak horik ho Nia” (vers. 38). Pedro ni akatekeze kontinua ho Jezús nia mate (vers. 39), nia moris-hi'as (vers. 40) no dimensaun salvasaun Jezús nia moris nian (vers. 43) maski la fó sai iha leitura ne'e.

EVANJELLU – Mc 1,7-11

Evanjellu domingu ne'e nian apresenta Jezús bá hasoru João Batista no simu batizmu husi nia iha mota Jordão.

João mak gia karizmatiku movimentu populár ida, ne'ebé haklaken katak “Maromak nia juizu” besik ona”. Ninia mensajen nia sentru mak konversaun no inklui ritu ida purifikasaun nian ho bee – ne'ebé frekvente iha grupu ruma judeu sira nian iha tempu ne'ebá nian. Iha João nia perspetiva, ema sira tenke arrepende; no atu bolu sira ba arrependimentu mak nia sarani sira iha bee. Iha João nia perspetiva, rekuza konversaun signifika atu husik Maromak nia hirus harahun sira hanesan du'ut ne'ebé ahi han.

Tanba sá mak Jezús mós tenke apresenta an ba João atu simu “batizmu” purifikasaun, arrependimentu no perdaun salan sira-nian?

Testu be'ebé ohin propoin mai ita halo parte konjuntu ida ho epizódiu inisiál tolu (kf. Mc 1,2-8; 1,9-11; 1,12-13) iha-ne'ebé Marcos apresenta Jezús nu'udar Mesias, Maromak nia Oan-Mane. Iha trítiku ne'e, define husi inísiu Jezús. Indikasaun sira iha-ne'e mak Marcos sei dezenvolve no kompleta iha ninia Evanjellu tomak.

MENSAJEN

Sé mak Jezús no sá oos ninia misaun, tuir mensajen epizódiu ne'ebé liturjia ohin propoin mai ita?

Iha parte dahuluk ita-nia testu (vers. 7-8), Marcos apresenta João Batista nia sasin kona-ba Jezús. João define Jezús nu'udar “Ida-ne'ebé maka'as liu ha'u, no iha nia oin nia la soi atu hakruuk hodi kore nia sandálias talin” no nu'udar “Ida-ne'ebé sei sarani imi iha Espíritu Santu”. Fortaleza nune'e mós batizmu iha Espíritu mak prerrogativa ne'ebé karakteriza Messias ne'ebé Israel hein (kf. Is 9,5-6; 11,2). João nia sasin la laran rua-rua: Jezús mak Mesias ne'ebé profeta sira haklaken katak Maromak sei haruka atu liberta nia Povu no haraik vida definitiva.

Maromak konfirma kedas João nia sain. Iha epizódiu batizmu nian, Marcos halo referénsia kona-ba lian ida husi lalehan ne'ebé apresenta Jezús nu'udar “Ha'u-nia Oan doben liu” (vers. 11). Mesias Povu hein mak Maromak nia Oan doben mós, Nia haruka atu sarani ema sira “iha Espíritu” no integra sira iha dinámika moris foun nian –moris iha Espíritu.

Maromak nia sasin akompañia ho faktu tolu, liga ho faktu no símbou sira Testamentu Tuan nian...

Nune'e, lalehan nakloke signifika uniaun entre rai no lalehan. Ilas ne'e simu inspirasaun husi Is 63,19, iha-ne'ebé profeta husu Maromak atu “loke lalehan” no tuun mai hasoru nia Povu, hodi hadi'ak relasaun ne'ebé Povu nia salan hakotu. Hao nune'e, Marcos haklaken katak Jezús ni aatividade sei rekonsilia lalehan no rai, hadi'ak relasaun entre Maromak no ema sira.

Símbolu manu-falur nian ladún klaru... Provavelmente, la'ós auzaun ba manu-falur ne'ebé Noé husik livre no fila fali ba arka/roo (kf. Gn 8,8-12); manu-falur (iha tradisaun judaika ruma, símbolu Maromaknia Espiritu ne'ebé. Iha inísiu, hatodan An iha bee eten – kf. Gn 1,2) ne'e fó hanoin kriaun foun ne'ebé sei akontese ho Jezús nia atividade sira.

Ikusmai, ita iha, lian husi lalehan. Ne'e mak forma ida rabbi sira uza beibeik atu espresa Maromak nia opiniaun kona-ba ema eh akontesimentu ida. Lian ne'e deklarata katak Jezús mak Maromak nia Oan-Mane; no halo ida ne'e ho fórmula ida foti husi knananuk "Jahwéh nia Atan nian" ne'ebé ita haree iha primeira leitura ohin nian (kf. Is 42,1)... Referénsia ba Atan Jahwéh nian sujere katak Jezús nia misaun la hala'o iha triunfalizmu, maibé iha obediénsia totál ba Aman; la kumpre iha podér no prepoténsia, maibé iha laran-maus, iha simplisidade, iha respeito ba ema sira ("nia sei la hakilarm la foti lian; la harahun oe, la hamate ahi ne'ebé sei lakan" – Is 42,2-3).

Tanba sá mak Jezús hakarak simu batizmu husi João? Jezús presiza eh lae batizmu peniténsia, perdaun salan nian no mudans amoris nian? Hodi simu batizmu peniténsia no perdaun salan nian (maski nia la presiza, tanba Nia la halo salan), Jezús solidariza nia An ho ema ne'ebé limitadu no maksalak, asum eninia kondisaun, tau nia an husi ema sira nia parte atu tulun sira sai husi situaun ne'e no la'o ho sira iha dalan libertasaun nian, dalan mori snakonu nian. Ne'e mak Aman nia projetu, ne'ebé Jezús kumpre ho modu integrál.

Nune'e, esensialmente, epizódiu batizmu nian revela katak, Jezús mak Maromak nia Oan-Mane, ne'ebé Aman haruka ba mundu atu kumpre projetu ida libertasaun nian ba ema sira. Nu'udar Oan loloos, Nia obedese Aman no kumpre Aman nia planu salvaun; tan ba ne'e mak nia ba hasoru ema sira, solidariza An ho sira, assume sira-nia frajilidade sira, la'o ho sira, hadi'ak fali komuñau entre Maromak no ema sira ne'ebé sala hakptu tiha no lori ema sira ba moris nakonu. Husi Jezús Maromak Oan nia atividade, sei hamosu kriaun foun ida, umanidade foun ida.